



列傳五

文苑傳

邯鄲淳一名竺字子叔潁川人博學有文才又善蒼雅蟲篆許氏字指初平時從三輔客荊州荊州內附曹操素聞其名召與相見甚敬異之時五官將丕博延英儒亦宿聞淳名因啟淳欲使在文學官屬中會臨菑侯植亦求淳操遣淳詣植植初得淳甚喜談論博辯淳甚服之暮歸對其所知歎植天人于時世子未立操有意於植而淳屢稱植材由是不頗不悅及黃初初以淳為博士給事中淳作投壺賦千餘言奏之丕以為工賜帛千

禹州志

卷之二十一

列傳五

匹魏志王粲傳注引魏略

褚亮字希明杭州錢塘人

亮入州志語見良傳後論

曾祖湮父玠皆有名

梁陳間亮少警敏博見圖史一經目輒誌於心年十八詣陳僕

射徐陵陵與語異之後主召見使賦詩江總諸詞人在席皆服

其工累遷為尚書殿中侍郎入隋為東宮學士遷太常博士煬

帝議改宗廟之制亮請依古七廟而太祖高祖各一殿法周文

武二祧與始祖而三餘則分室而祭始祖二祧不從迭毀未及

行坐與楊元感善煬帝矜已疾才因是亦貶西海司戶時博士

潘徽貶威定主簿亮與俱至隴山徽死為歛瘞人皆義之後為

薛舉黃門侍郎舉滅秦王謂曰寡人受命而來嘉於得賢公从

事無道君得無勞乎亮頓首曰舉不知天命抗王師今十萬衆兵加其頸大王釋不誅豈獨亮蒙更生邪王悅賜乘馬帛二百段卽授王府文學高祖獵親格虎亮懇愾致諫帝體納其言王每征伐亮在軍中嘗預祕謀有裨輔之益貞觀中累遷散騎常侍封陽翟侯老於家太宗征遼子遂良從詔亮曰疇日師旅卿未嘗不在中今朕薄伐君已老俛仰歲月且三十載眷言及此我人如何今以遂良行想君不惜一子於朕耳善居加食亮頓首謝及寢疾帝遣醫中使侯問踵相連卒年八十八贈太常卿陪葬昭陵諡曰康初武德四年太宗爲天策上將軍寇亂稍平乃鄉儒宮城西作文學館收聘賢才於是下教以大行臺司勳

禹州志

卷之二十一

列傳五

二

郎中杜如晦記室考功郎中房元齡及于志寧軍諮祭酒蘇世長天策府記室薛收文學褚亮姚思廉太學博士陸德明孔穎達主簿李元道天策倉曹參軍事李守素王府記室參軍事虞世南參軍事蔡允恭顏相時著作郎攝記室許敬宗薛元敬太學助教蓋文達軍諮典簽蘇勗並以本官爲學士七年收卒復召東虞州錄事參軍劉孝孫補之凡分三番遞宿於閣下悉給珍膳每暇日訪以政事討論墳籍權略前載無常禮之間命閣立本圖像使亮爲之贊題名字爵里號十八學士藏之書府以章禮賢之重方是時在選中者天下所慕尚謂之登瀛洲其後史臣宋祁以亮邃雅與姚思廉並稱謂借山文本虞世南李百

藥令孤德棻諸人淚汨于隋光明于唐云唐書本傳增補
韓毅潁川人工草隸元宗時爲太子賓客

孫氏陽翟人見唐詩引証目

李廌字方叔其先自鄆徙華廌六歲而孤能言奮立少長以學問稱鄉里謁蘇軾於黃州贊文求知軾驚指其背曰子才萬人敵也抗以高節莫之能禦矣廌再拜受教家素貧三世未葬一夕撫枕流涕曰吾學爲忠孝而親未葬何以學爲將別軾客游四方以歲其事軾解衣爲助又作詩以勸風義者於是不數年盡累世之喪三十餘椁歸窆華山下范鎮爲表墓以美之益閉門讀書又數年再見軾軾閱其所著歎曰張耒秦觀之流也鄉

禹州志

卷之二十一

列傳五

三

舉試禮部軾典貢舉遺之賦詩以自責呂太防歎曰有司試藝乃失此竒才耶軾與范祖禹謀薦諸朝未幾相繼去國不果軾亡廌哭之慟曰吾愧不能死知已至於事師之勤敢以生死爲閒耶走許汝州相地卜兆授其子作文祭之曰皇天后土鑒一生忠義之心名山大川還萬古英靈之氣詞語竒壯讀者爲悚中年絕意進取定居長社縣令李佐及里人買宅處之卒年五十一廌喜論古今治亂條暢曲折辨而中理元祐求言上忠諫書忠厚論并獻兵鑿二萬言論西事朝廷擒羌酋鬼章將致法廌深論利害以爲殺之無益願加寬大當時避其言宏簡錄

曹紱與兄緯有聲太學能詩文宣和三年始登第郊禮進祥光

賦詔給事殿中爲睿思殿應制與李質各獻艮岳賦上善之著
箕穎集二十卷 舊志

王道衡字子正至大中以明經擢進士第嘗作宣聖始終辨惑
記刻於湧泉里夫子廟 舊志官績
今改刊

李叔允洪武初由儒士授國子監博士纂修昭鑒錄書成擢翰
林修撰又與宋濂等修洪武正韻等書後致仕濂與劉基等皆
贈以言 舊志

邊寧字定之少有文名永樂戊子舉鄉試任綿州郪州學正詔
入文淵閣纂修永樂大典校正七館書文鄉人稱爲邊夫子 舊
陳東光字叔晦號平崗好古善大字尤精小楷所至人多購求

禹州志

卷之二十一

列傳五

四

甲午中鄉式明年成進士選庶吉士館課小以原政論讀五倫
書有感詩咸第一文明大噪於時鄉里後進稍涉驕浮人輒訾
笑之曰若有陳平崗文耶乃傲物在館中旣以才名爲時所嫉
又高自矜許多忤館師意遂左遷聞命卽跨一蹇刻期就道或
挽之徑不聽抵任所七日而起歷雲南按察使四川布政使歸
卒於家 舊志

劉玉威字蒼佩號樾菴通判湛子性沉靜口不臧否人才敏學
博善文辭及草聖工詩弱冠卽名噪中州北遊趙魏入都門諸
公卿多傾蓋然非其好也謝歸嘗與竇靜菴冉永光耿逸菴諸
先輩講蘇門之學作詩文畧不構思傾刻而就人有求者皆如

其願以去郡中有六典禮必諮之所著來嵩閣詩集文集若干
卷藏於家年七十卒 舊志

趙冬晟字友春號松園舒城知縣來鳴仲子幼穎異有神童之
目十歲能詩登偃蓮頂賦詩有雋句十二入學志趣落落每譏
絳灌無文隨陸無武因額其堂爲兼習行年五十貢於鄉與陳
蘭崖馬子陶劉蒼佩倡和往來爲忘形交詩益沈雄年七十九
授林縣教諭以老辭所著有松園詩草吳越游草怡山堂草四
書日講偶筆卒年八十五 舊志

董祚宏字玉崑號前月明經大參九貢孫高才博雅天分過人
工詩古文詞灑灑數千言立就善書畫愛州北崆峒名勝時乘
禹州志 卷之二十一 列傳五 五

短驢登臨其上數月忘返因別號崆峒山道人所著有桐山集
醉吟集狂仙放言丹青引 舊志

陳鳴臯字鶴士號蘭崖別號鏡峽散人性高曠讀書過目成誦
未弱冠補弟子員旋拔成均初赴省闈搜檢欲解其衣拂然而
歸自此絕意仕進於城隅闢園林延同志者飲酒賦詩州守劉
口聘修州志考核精確所著有桐山護語及五服指掌撮要圖
歌後述災小令若干卷

馬淑字子陶號峯山農部慤之孫州庠生也性穎異日記數千
言工詩詞河南通志採入藝文與弟融相友愛白首無間入省
闈已登薦額因謄錄訛錯被落遂不復走場屋日與二三高人

飲酒賦詩尋山問水而已所著有野吟集

康麒孫字博學允執從孫嗜古所著有癡癡子存稿今已散佚
工六書尤善行草宗法二王有所書烈婦鍾氏碑銘集右軍書
爲之工妙不下懷仁所集聖教序在白沙鎮採訪冊

義行傳

董英李禎李銘任諒梁圭陰燧明正統間有旨勸民出粟賑荒
英輩各納一千五百石有司上其事旌表其門舊志

馬貴景泰年以邊警輸粟有司奏聞給冠帶仍旌以坊舊志

馬瑋當成化時西陲告急下令民間輸粟瑋輸粟實邊有司上
其事授七品散官遇年饑糜粥活人甚多又二年弟瓚輸粟助

禹州志

卷之二十一

列傳五

六

餉事上於朝嘉其義亦例授七品散官舊志

李愷剛直有斷鄉曲事無巨細兩言而決退無異辭成化十年
大饑出粟六百石賑濟有司禮爲鄉飲賓壽八十四舊志

馬榮成化二十年大饑出粟千石賑濟舊志

盧綱成化四年納粟五百石受勅旌表舊志

孫貴州西順鎮里人同鎮人張明貸勢家銀三十兩醉遺於道
比至家兄弟聚哭貴見之嘆曰此必傷人命矣歸言其事乃聞
已子增得之卽完付於明嘗行債登封夜寢於金店唐明之家
盜攻唐氏戒曰勿驚孫老舊志

李備撫二弟憫任皆成名經歲荒施粟賑饑按院旌之舊志

馬懋字肖古叅議斯臧子性豪俠萬歷三年施義田二十頃舊志
張景良庠生有山左田國盛密貯金景良處忽國盛醉死於塗
景良卽出其銀盡爲棺葬費知州李永彪旌其門舊志

董邦治生員能文章自設義學貧不能卒業者皆教之多所成
就舊志

王昌字惠字登封庠生禹人也少遭亂不輟學年二十從父兄
避難於密邑歲餘父兄亡乃冒險奉母嫂還禹順治初年亂甫
定人不知學昌立義塾教授生徒族人王之模家貧昌爲娶妻
授庄田爲王之義娶妻妻亡再爲娶里人王佑張武傅永福王
輔等孤貧無依皆爲娶妻且伙助焉康熙四十八年春饑散積
穀以活衆年九十三卒卒之夜有羣鶴飛聚庭前達曙而去里
人異之競爲詩文以紀其事舊志

禹州志

卷之二十一

列傳五

七

冀倬字漢章生員兒時與父食棗擇其瘠小者食之善事繼母
邊氏外家貧出已貲三百金爲置田頃餘析居時弟之子衆多
以別墅田三頃讓之舊志

楊世華庠生文英子康熙四十八年歲歉家積雜糧三百餘石
悉散之戚友貸其銀至六百餘兩不能償輒焚其券里人義之

舊志

陳三哲世業農家初貧以賈術致數千金族兄三策爲官事以
地求售却其產贈銀濟之於襄陽道見鬻鬻女者相持泣卽贈銀

令完娶脩嵩東山路及石梁仙墳堰口權家店沈家庄諸橋費以千計許州大守姚口州守高口旌其門曰樂善不倦曰太邱家範

舊志

陳從任監生幼業儒析居時念其兄貿易獨勞以田二頃宅一區讓之修理石固橋捐銀二百兩助工鄰人魏留郭連城親死不能殮助以棺又與以錢麥每冬月施衣百件行之十餘年不倦州守章口匾其廬曰古道在人

舊志

王道中字貫一紅暢鎮人康熙六十一年歲歉出粟百餘石賑鄉里乾隆五年秋淫雨穀價昂貴減值糶米麥數百石乾隆六年倡修藍水河石橋又修潁水石橋及普濟堂聚星書院捐助

禹州志

卷之二十一 列傳五

八

獨多又置義塚施棺木晚年聚子姪孫曾輩教以孝弟節儉至今百口共食五世一堂公藝之風爲不遠矣前儒學孫口知州高口俱表其廬壽七十四卒邾邑劉太史斯和誌其墓

舊志

胡大猷字濟遠監生常買鄰縣張姓徐姓女爲婢後聞張女已字人招其父子之不責償并徐女亦厚其粧奩嫁之人稱其厚

云

舊志

倪鳴岡禹人武生幼失怙恃從兄宜振撫之成立鳴岡事之一如事父家不甚饒課徒爲業而篤於任郵從兄克振負夙逋不能償鳴岡售地九十餘畝代爲清償從姪適袁姓夫婦俱亡遺二甥無所依鳴岡撫之訓課讀書表姪彭孝幼喪父母留養家

中八年並爲擇配表叔王國治死，具無以殮，鳴岡助之棺，祥符人王三貧困賣子，鳴岡勸令勿賣，以金周之，骨肉得全，嘗見瞽者安羣，孩童屈甲，匍匐道中，詢之，皆無家可歸，鳴岡惻然，卽收養於家。中州彰善錄

李珣，禹州學廩生，善事繼母蕭氏，外祖家有婚喪，珣力任之，以慰母心，母故哀毀，骨立，兄亡，遺兩姪，皆幼，珣教養備至，敬事孀嫂，以家務悉歸嫂氏經理，迄今十三年，無間言，又於州之紫金里暖泉觀創建義學十間，遵照白鹿洞條規訓迪生童，李三江等五十餘人，身任約正，誠心開導，愚民遠近義之。中州彰善錄

魏繼賢，禹人，好善慕義，乾隆五年冬，山所儲雜糧製綿衣助給

禹州志

卷之二十一 列傳五

九

貧民之凍餒者，自十二月二十三日~~起~~至三十日止，共施過雜糧二十四石，米麥三石，襖褲數件，六月~~內~~正月內捐給本庄貧農袁希萬等三十二戶，借給附近庄村~~貧~~農白文明等七十五戶穀麥籽種工本共一百一十八石四斗。中州彰善錄

王廷魁，禹人，業農，產不及百畝，而賦此本善所居，褚河鋪西之潁河往來通衢，水寬流急，行人步水，維艱，雍正八年，廷魁出資六十餘金，創建木橋一座，復慮每年修葺，恐有不繼續，捐臨河廟側上地十畝，歸於廟，報州立照，令住持道人管業耕種收籽粒，以隨時修葺，乾隆五年冬，出雜糧銀~~錢~~在本村助給貧民白十二月二十日起，至二十日止，共施過~~雜糧~~四十石。中州彰善錄

孫萬昌禹人業農居孫家莊乾隆五十年春災後莊民乏食萬昌出所貯麥三十石分借莊鄰人曰新麥二斗之價尙不足償舊麥一斗請議所償萬昌曰吾祖文玉四年經本州丁公以善行蒙旌者今若如此較及錙銖是無孫之不重吾過乎鄰人咸服其義而稱其孝同莊王小三七歲父死家極貧萬昌助銀殮葬收育小三於家張氏寡居子幼無生訂萬昌助之薪米與之木棉令氏紡織張氏母子乃得存活中州彰善錄

魏繼貢禹人太學生樂善好施乾隆四年秋霪雨入市無糧糧價昂繼貢悉出倉儲自八月起至五年五月止減市價十之一共糶過穀麥雜糧一千七百七十八石普濟貧民中州彰善錄

禹州志

卷之二十一 列傳五

十

張愛字德佩監生里人楊德潤負債不能償焚其券又念德潤家貧親老與莊基一址耕田二十五畝更給棺木以葬親族人張子銳於愛地得一篋瓮貯銀十兩金珠一掬齎於愛愛不受子銳固讓乃收珠一粒銀皆歸子銳萬壽寺古槐爲僧所賣愛償值而歸之開林莊本業地爲孔道以便行人州守蕭應銳給匾曰樂善可風採訪冊

王心儒嘗推小車養母道拾遺金幣十兩守候失者與之乾隆十九年州守王秉綱賞以銀牌鼓吹花紅旌褒之並給匾額表其門採訪冊

張金錫性醇樸敦友誼嘗游寶豐有負債鬻子者金錫爲之贖

友人馮孝先貧不能娶金錫助其資成之關中喬國璽賈于禹娶少婦置產業僑居金錫所越二載喬患瘟証病篤始言爲大荔縣人妻子尚存及卒少婦欲貨其產改適金錫許入關訪其居處詢妻子名姓俱符遂偕其子來禹售產扶柩勸少婦西歸州守崇士錦給匾曰庸行克敦

採訪冊

彭百齡家貧田數畝曉出操作於路側拾一囊頗重藏之家日下午有戴姓來訪言囊中銀百兩而開視之不誣百齡推與之戴欲分其半以贈不受

採訪冊

朱塘事祖母董孝頤養幾四十年董壽百有二歲繼母蔡多病侍湯藥十年不懈事見續通志修南衙官地爲義學出已財延

禹州志

卷之二十一

列傳

七

師督之州守王秉綱題曰童蒙書院塘沒子監生孔德復施田二十畝爲塾師脩脯資子弟多有所成就至今賴之

採訪冊

郭山乳名二旂城內郃立也僕郃貧老無子山以行傭養其夫婦並送其終立也之弟大鼎任河南府學教諭歿於任其子在家亦卒孫幼貧不克葬山時隨王嘉慶以羅山縣任聞之扶持大鼎孫至洛陽設法得費以歸葬人爭送我之

採訪冊

孫文周監生性孝謹樂施予嘉慶二年修呂梁寨出粟二十石助工五年修人和寨鄉人有懼捐其田者卽以已田易之復出費三百千助工及修塘口河南柳河澗諸石橋皆多所贊助八年春穀價騰踊出藏粟百餘石減價

乙十八年歲大饑里人徐

里賣妻自給文周出貲贖之以歸徐採訪冊

孫文昭監生性慷慨遇事有權畧嘉慶五年教匪犯邳縣相去密邇文昭稟請州守集鄉勇爲禦寇計旣而賊不果來乃倡議築土於呂梁山之陽以圖固守衆咸樂從工竣顏其名曰人和焉採訪冊

婁鍾明工技擊術明季遭寇亂有工賊掠民女子宋家樓鍾明聞之率衆奪之歸資嫁之採訪冊

吳甲性勤敏有幹略自明以來禹富孔道民苦郵驛州守黃致中始建議以由禹路僻遠改石堦驛隸長葛甲實助之邳北溝路有坎夏多積水爲行人患甲父國楨欲砌以磚未果甲以石

禹州志

卷之二十一 列傳 五

十三

鋪之成坦途遠近德之書石以

族叔國臣以園五畝售國楨

後益困甲奉國楨命焚契歸業族有不給者力助之採訪冊

王作柱字殿盤性豪俠重義同產兄弟四人析居時羣以作柱

治家勞讓以產固辭不受族中子弟有不務正者合族長立家

誡以約之皆改行故入其鄉無博奕嗜酒構訟之人嘉慶癸酉

大饑出粟爲倡徧勸族人輸得粟七千餘石活人以萬計木廠

口山路十餘里南通神屋鎮北通石峽峪崎嶇難行首倡醵金

鑿石開道往來者至今便之里人崔某父母死鞏縣周某父死

無以爲殯助以棺且予地使之葬前買登封趙氏女後買州人

王氏女以爲婢旣聞皆已字人即助妝遣嫁且還券不責償有

負其債至四千餘金者歲荒無以爲償乃盡焚其券後有償之者則以無券辭其慷慨好義類如此前州守崇口旌其門曰勇從好施作柱捐營千總銜鎮峯里八甲人採訪冊

論曰司馬氏傳游俠後儒譏之雖然睦嫺任恤之風載之周禮亦不可以盡斥爲好名也近人或寧縣志序義行云後世鄉曲之士有能贍困拯急功在閭里者文士載筆樂爲稱之昔人所謂一介之士存心愛物於物必有所濟其言臆矣以別於忠義故特標名焉

隱逸傳

司馬徽字德操潁川人清雅有知人鑒劉先主嘗訪世事於徽

禹州志

卷之二十一

列傳五

十三

徽曰儒生俗士豈識時務識時務者在乎俊傑此間自有伏龍鳳雛先主問爲誰曰諸葛孔明也龐士元也士元名統少時樸鈍未有識者統冠以從父龐德公命往見徽徽採桑於樹上坐統在樹下共語自晝至夜徽甚異之稱統爲南州人士之冠冕由是漸顯德公襄陽人徽嘗造之值其渡沔上祀先人墓徽徑入其室呼德公妻子使速作黍徐元直向云有客當來就我與龐公譚其妻子皆羅列拜於堂下奔走供設須臾德公還直入相就不知何者是客也徽年小德公十歲兄事之呼之爲龐公徽旣與統言嘆曰德公誠知人此實盛德也卧龍鳳雛皆德公所品而謂徽爲水鏡云蜀志諸葛統傳注引襄陽記

盧損爲秘書監拜章辭位乃戶部尙書致仕退居潁川時李
穉年將八十善服氣導引損以穉之遐壽有道術酷慕之仍以
潁川逼城市乃居陽翟立隱舍誅茅種藥山衣野服逍遙於隱
几之間出則柴車鶴氅自稱且茨山人晚年與同遊五六人於
大隗山中大仙觀疏泉鑿環爲隱所誓不復出山氣多寒被病
而卒時年八十餘齒髮不衰而有壯容

杜生陽翟人不知其名邑人但謂之杜五郎所居去縣二十餘
里有屋兩間一間自居一間其妻子居之室之前丈餘卽是籬
門杜生不出籬門凡三十年矣黎陽尉孫軫問其不出門之因
笑曰以告者過也指門外一桑曰十五年前亦曾到此下納涼

禹州志

卷之二十一

列傳五

古

何謂不出門也但無用於時無求於人偶自不出耳問其所以
爲生曰初唯與人擇日賣醫藥以其體弱後子能耕鄉人與田
三十畝令耕之有餘力又爲人傭耕以此食足自爾擇日賣藥
一切不爲又問常日何所爲曰端坐耳問頗觀書否曰曾有人
惠一書冊無題號其間多說淨名經當時極愛其議論今亦忘
之並書亦不知所在矣

詳步筆談

褚惠字仁靜陽翟人晉安果將軍碧之七代孫也曾祖元振周
縣令祖德康隋郡長史父倪縣尉惠恬於勢利絕於聲色聞居
一室游心六藝每清風朗月縱酒題編春秋六十五卒於館舍
以唐咸亨三年九月二日遷窆於郭村北原嗣子買德銘其墓

舊志云詳見徐憲使築垣所得誌石

陳恬字叔易居陽翟澗上村號澗上丈人無仕宦意崇觀間朝廷召之州守勸駕不得已而起冕以道時致仕居嵩山有詩云處士誰人爲作牙盡携猿鶴到京華從今林壑堪惆悵六六峰前只一家又過澗上丈人陳恬故居詩云北山云已遠南山云已近駟車兩山間舉策聊一問昔有隱君子出處頗矛盾平生勇且直垂老畏而慎皆譏言也後靖康間以道再起而女弟四娘適唐氏者頗復誚其出焉

見詩話

邊賀字文慶天資穎慧工於詩文邑中祠宇碑銘多所撰記幼與蔣少參講學數勸進取不聽隱處靈泉里耕灌吟咏畧無外

禹州志

卷之二十一

列傳五

五

慕自號箕山遯夫年八十四卒

徐祿字天錫西南隅人少有志性讀書過目輒不忘從父純習舉子業由儒士應鄉試者二以不合於有司遂著分定論築居於鞦山之麓垂三十年足跡不履城市尤邃於易倘佯山水翛然無物累年八十三卒

郭鏗字邦器折節向學以貢入太學肄業時言官封事有重科日而抑歲貢者鏗聞之卽免巾投地然燈草奏數百言議論剴切當路者止之悵然歸東原遂不入城市卒老於家所著有東原小稿國學隨筆

楊政儀貌竒古幼好學不事舉業足跡不及城市事父母孝謹

友於兄弟終身無遠容村西置園數畝築室修藥鑿池養魚日
延四方高士論議故典飲酒微醺卽止晚遇異人授秘術煉服
丹砂駐顏引氣州守廬陵劉公魁三迎鄉飲卒不至壽八十餘
而終

張翼少業儒長精數學遊於消上范太常守已貧而孤翼奇其
造躬教之學范起家進士以文名世傳其數更加精研占驗有
準詔以太常少卿修大統歷終身事翼翼三十餘始遊庠未五
十卽棄去隱居潁水北村不久城市幾三十年自號潁濱居士
年八十餘卒預知來生事人尤異之

王易醴泉令用賢子少傳家學徵王強婿以郡主非其好也性
禹州志
卷之二十一 列傳五
嗜詩書不以富貴介意徵府廢獨免於禍家無餘資與妻偕隱
南園種菜自給喜吟咏善趙松雪體惟與一二知己銜盃聯句
縉紳雅敬重之妻被其化甘貧如飴夫婦偕老八十餘卒著有
聖鼻草

董九章字仲衢九貢九叙弟也兩兄科第宦遊九章躬耕百畝
遯跡子產廟前村惟以務農完租爲事終身無華衣美食戴民
巾不易有以雜職剗授者面發赤堅却之曰農人安用此鄉人
稱爲董小帽前州守田公蕭公延爲飲賓皆不赴以上皆舊志

李貞世居禹之西鄙賦性高潔幼讀書卽不樂仕進壯游秦晉
吳楚間氣益豪晚年好黃老精數與人以厭交接移家能耳山山

絕幽邃尤勝者爲白石峯遂自號白石山人人亦以是稱之鼓琴舞劍傲然自得嘉慶庚申寶邾間教匪不靖貞子武舉天澤隨巡撫馬公慧裕擊賊貞陳方略數事用之皆有效馬公旣平邾亂欲奏其功貞辭且曰邾亂平吾禹亦無憂矣敢忘先人墳墓耶遂還里三載而沒年七十八是時鈞陽里李重喬者亦以隱逸稱壽尤高時人謂之曰二李

採訪冊

李重喬家於婁敬山自號敬山居士父永譽州學增生中年喪明重喬七歲父口授四書易書詩三經長而能文以父母繼沒遂不就試於婁敬山麓編茅構亭讀書其中手植綠竹數十竿松柏楊柳各數十章藤蘿交映苔徑盤曲稱勝境焉有請業來

禹州志

卷之二十一

列傳五

七

者亦爲啓迪時知名之士如任西白李大敬任楸聲輩皆出其門嘉慶十一年壽百有二歲無疾而卒足不至城市者八十年

採訪冊

方技傳

褚該字孝通陽翟人幼而謹厚善醫術仕梁歷武陵王府忝軍隨府西上後與蕭瑒同歸周自計冀死爲時人所重賓客迎候者無虛日天和初位縣伯下大夫進授車騎大將軍儀同三司該性淹和不自矜尚但有請之者皆爲盡其醫術時論稱其長者子則傳其家業

北史本傳

吳道元字道子

張彥遠云初名道元宗改名道元

東京陽翟人也

見書家傳少

孤貧天授之性年未弱冠窮丹青之妙浪迹東洛時明皇知其名召入內供奉

張彥遠云初任兗州瑕邱尉元宗召入禁中殿內教博士官至寧王友

開元中駕幸東洛吳生與裴愛將軍張旭長史相遇各陳其能時將軍裴愛厚以金帛召致道子於東都天宮寺爲其所親將施繪事道子封還金帛一無所受謂愛曰聞裴將軍舊矣爲舞劍一曲足以當惠觀其壯氣可助揮毫愛因墨線爲道子舞劍舞畢奮筆俄頃而成有若神助張旭長史亦書一壁都邑士庶皆云一日之中獲觀三絕又畫立元廟五聖千官宮殿冠冕勢傾雲龍心歸造化明皇天寶中忽思蜀道嘉陵江水遂假吳生驛調令往寫貌及回日帝問其壯奏曰臣無粉本並記在心後

禹州志

卷之二十一 列傳五

六

宣令於大同殿圖之嘉陵江三百餘里山水一日而畢時有李思訓山水擅名帝亦宣於大同殿圖累月方畢明皇云李思訓數月之功吳道子一日之迹皆極其妙畫內殿五龍其鱗甲飛動每天欲雨卽生烟霧凡畫人物佛像神鬼禽獸山水臺殿草木皆冠絕於世

唐朝明畫錄佩文齋書畫譜卷四十六引

李恭以醫著名父卒廬墓三年永樂三年方司馬廉知薦於朝徵爲太醫院

新

舊志列孝子傳按恭孝止廬墓一事不能立傳今以其善醫改入方伎

孫相世爲陽翟人元末任山西平陽府醫學教授相生思忠爲

明初名醫思忠生奉源典科源生希禮太醫院博士宣德中舉
正朱仲堅有疾夢天神示以丹篆曰希禮神醫迎而醫之果愈
希禮生鏡生釗釗生清傳祖父秘訣醫尤精妙臨穎大學士賈
詠重其術爲詩以贈之

侯邦寧善醫性高潔不治生產但市園亭一區種藥栽花與相
知圍棋飲酒或焚香鼓琴所得名人墨蹟什襲珍藏卷軸滿篋
太和王有疾瀕危一藥而愈名重一時

李闡瞽目善卜每午後卽下簾靜坐問亦不告旣買卜者多亦
不獨利所得卜錢日用足給外輒以施捨司理王公駐禹以憂
家延闡卜之甫入門公卽曰若知觀風首爲誰應曰已許連三
禹州志

卷之二十一 列傳五

九

矣連三者連孝廉得民也啟視之果然遂竒之所卜家信皆如
其言
王奎石遺其名少遊燕邸善畫人物其爲鍾馗像極其醜態雖
百紙不相襲也百仙圖有翛然塵外之致百美圖雖極艷麗各
具貞靜之體狄梁公望雲諸葛武侯草出師表圖皆善寫忠臣
孝子之情狀其設色用墨亦不猶人

馬燧國初時人善畫博覽諸家尤愛摩詰晝夜揣摩一旦恍得
其要巧思濬發人物悉佳而山水特絕遠近投絹素者盈箱不
數日而畢或問其何以敏妙如此答曰藝事亦以學問爲主多
觀經史典故熟爛唐詩宋詞則布局設色自然有本矣

以上舊志

監生胡鳳鳴文風里十甲人好施與精岐黃嘉慶十八年歲饑有于姓平其墳墓爲熟地售鳳鳴旣鳳鳴知之召于謂之曰汝愚無知豈可以子孫而毀祖宗墳墓乎面焚其券仍令封培如舊有夫婦俱瞽引一小兒行乞至其門兒將出痘鳳鳴迎語曰此子出痘甚逆不可以風遂令人送一小廟內供柴米藥物日親爲看三二次踰百日兒得無恙復給米麵使之去鄉人至今稱其賢云 採訪冊

魏松林歲貢生性耿介喜誦讀工書因多疾謝舉子藝專力岐伯術有困乏者輒周恤之有善可嘉者旌表之鄉黨稱其德 採訪冊

禹州志

卷之二十一 列傳五

二十

黃甲第字千石州學生員善風鑑善卜尤精岐素客京師有薛太史父患者羸求醫治之一藥而愈酬以金不受乃延爲上賓以薦入太醫院兼理院判事謝病歸子璋考授太醫院吏目 採訪冊

張烈字推已號市隱精易理業岐黃專心致志寡言笑絕交游居東門外留侯洞十年不出遠近求醫者戶外屢滿子百祥能繼其學所著有合意錄一卷傳世 採訪冊

傅純仁字全一本董氏子繼於傅氏性恬退不慕仕進工詩善畫竹蘭外尤精芙蓉不用設色能以澹墨揮灑橫斜側仰各臻其妙有求者應之不少各築別墅於城北杏山麓號杏山云

修跋采
訪冊

二氏傳

劉諷字偉節潁川人師司馬季主服日月精華得道後歸鄉里託形杖履而去真諾云潁川劉偉節漢景帝時公車司馬劉諷也事司馬季主爲入室弟子道成晚歸鄉里託形杖履身死桑樹之下今墓在汝南安城縣見後漢書舊志

劉根潁川人隱居嵩山中諸好事者自遠而至就根學道太守史祈以根爲妖妄乃收執詣郡數之曰汝有何術而誣惑百姓若果有神可顯一驗事不爾立死矣根曰實無他異頗能使人見鬼耳祈曰促召之使太守目視爾乃爲明根於是左顧而嘯

禹州志

卷之二十一

列傳五

三

有頃祈之亡父祖近親數十人皆反縛在前向根叩頭曰小兒無狀分當萬死顧而叱祈曰汝爲子孫不能有益先人而反累辱亡靈可叩頭爲吾陳謝祈驚懼悲哀頓首流血請自甘罪坐根嘿而不應忽然俱去不知所在後漢書或云劉根先生脩大洞帝乙之道游宦四方爲政有德晚歸嶽之東峯鍊真朝斗服氣而化舊志

李穉晉時人年將八十善服氣導引尙書盧損以穉之遐壽有道術酷慕之誅茅種藥山衣野服逍遙於隱几之間出則柴車鶉衣自稱具茨山人晚年與同遊五六人于大隗山中古宮觀跡泉鑿坏爲隱所誓不復出廬時年八十餘齒髮不衰而有壯

容穉之脩養似可信云

訾亘初家世博州賦性淳厚平居寡言嘗遊歷濟南逆旅中遇丹陽真人馬鈺從而師之又往拜長春子邱處機人稱訾仙翁自號守真子杖履南遊抵鈞臺蓮首垢面衲衣草履滅跡匿影緘口結舌晝則乞食於市夜則歸河龕太和間冬大雪丈餘人凍餒多死先生不出十餘日人以爲死矣各執畚鍤欲往埋瘞除雪視之儼然端坐殊無寒餒之色人方驚訝貞祐間元兵破關陝犯京師軍民懼恐先生曰無妨必自穎亭過鄭何必憂懼三日果如其言至大四年久旱請先生行祈雨醮事立獲霑足金哀宗幸汴問百官天下城池盡皆攻陷此城獨安其故何也禹州志

卷之二十一 列傳五

三

百官僉對以訾尊師保佑之力上大喜卽日召對問答如流莫不稱旨甲午正月初七日留遺世頌曰一念不起萬緣皆空拂袖而去明月清風擲筆而返真春秋八十有二未及葬翌日城陷矣

楊應祥鈞州白沙里人正統時爲僧居貴州金竺長官司羅永菴建文遜國後嘗至菴題詩壁間曰闕罷楞嚴磬癩敲笑看黃屋寄團瓢南來瘴嶺千層迴北望天門萬里遙款段久忘飛鳳輦袈裟新換袞龍袍百官此日知何處惟有羣烏早晚朝應祥竊帝詩詣思恩知州岑英自言曰我建文皇帝也英大駭聞之藩司奏上核非真下錦衣獄論死從者十二人戍邊應祥以僧

而代建文死亦異人也見明史紀事本末

建文遜國事前人已屢辨之茲仍舊志姑載

王金字芝山幼警敏異常受仙術于白羊山道人一時名公巨卿多師事之明肅皇帝聞其術詔於大內闈三元大丹之旨肅皇愉悅因有王仙之褒教授太常卿日延三接稱必師公溫旨錫予終肅皇之世者三百餘次金屢進忠款有靈芝瑞龜香山法酒玉樹瓊林仙燈壽香之獻肅皇臨御四十餘年不倦於勤者金之力居多肅皇上賓金亦逡巡棄世人以爲尸解云子大容孫道平世傳其術亦多奇中

寶巖大師姓李氏名崇閔家世琅邪之任縣父母徙居汝南獻禹州志

卷之二十一

列傳五

三

年二親俱喪兵變後隨親友還本鄉時年十八出家奉禮邪臺大士可安菩薩爲師肄習經業修建塔緣誓曰雁翔二十級須要免食十萬斤倏然夜夢吞鉄佛三尊逮至晨覺勇力百倍惟神之助一舉成就寶相輪衆口稱爲鉄菩薩丁未以二親留汝南淺土收遺骨歸葬本鄉後行化至釣臺范使君識師器量標格請住持本州善財寺重脩寶塔後化道盛行晴雨疾病感應良多至元間特賜寶巖大師號

智廣姓董氏子產里人少有佛性惡其父屠諫之從業不從逃入伏牛山從釋苦脩十年恍然有悟歸視南山東峰可立叢林誓爲之族人捐貲爲助王公貴人聞風施舍即就觀音堂拓爲

殿閣禪堂五十餘間金碧輝煌法像莊嚴又募置贍田十頃
徒十餘衆鑿山移石剗地種樹爲衆倡年七十餘不倦守戒律
甚嚴僱工化之亦不茹葷忽沐浴畢跣趺而化

白雲道人姓李氏不知所自來冬夏俱方市白袷日游里閭或
醉卧酒肆或酣眠道周人亦未知異也值天旱禱雨官僚咸在
乃登壇作法倏然雲台命胥役人持一磚縱飛騎分出四郊極
力所止投之雨遂以是爲界又爲一故家逐邪邪初猶戲侮之
俄聞哀號乞命乃嚴責而遣之曰汝亦數千年物吾不忍殺汝
也自是遂絕崇禎末道人竟不復見

以上俱舊志

寓賢傳

禹州志

卷之二十一 列傳五

三

宋均字叔庠南陽安衆人以父任爲郎年十五好經書每沐浴
日輒受業博士通詩善論難卒以母喪去官客游潁川後爲司
潁校尉河南太守

後漢書本傳

盧照隣字昇之范陽人文學有名調新都尉病去官居太白山
得方士元明膏餌之會父喪號嘔丹輒出由是疾益甚客東龍
門山布衣藜藿裴瑾之韋方質范履冰等時時供衣藥疾甚足
攀一手又廢乃去具茨山下買園數十畝疏潁水周舍復豫爲
墓偃卧其中著五悲文病黎賦以自傷疾旣久與親屬訣沈潁
水死

唐書文藝傳

李翰趙州贊皇人補闕華宗子擢進士第調衛尉嘗撰張巡傳

上於朝巡大節始白於天下義士多之累遷左補闕翰林學士
大歷中病免客陽翟卒翰爲文精密而思遲嘗從令皇甫曾求
音樂每思酒則奏樂神逸乃屬文云 唐書文藝傳

楊億字大年建州浦城人七歲能屬文對客談論有老成風年
十一太宗詔試詩賦五篇下筆立成太宗深加賞異授秘書省
正字特賜袍笏俄丁外艱服除會從祖徽之知許州億依焉務
學晝夜不息微之間與語嘆曰興吾門者在汝矣後官至翰林
學士有別墅在許之陽翟祥符中母病歸陽翟謁告不待報歸
省俄自以病乞解官初王欽若陳彭年忌億名出其右相與訾
毀真宗將立劉后欲令億草詔丁謂喻旨億難之謂曰勉爲此

禹州志

卷之二十一 列傳五

三五

不憂不富貴億曰如此富貴非所願也乃陽狂奔陽翟臺官劾
之左授太常少卿分司西京許就養病上親織藥劑加賜金帛
億表謝作君可思賦以抒忠悃其後病愈復起爲他官終翰林
學士卒年五十七謚文公葬陽翟具茨山下生平所著別集甚
多有穎陰韓城二集乃避讒佯狂歸陽翟時所作 魏增補

張宗諤蜀人罷官歸陽翟蘇軾稱其高 詳見東坡集

楊億字弁叔大年季弟也官禮部員外郎歿葬陽翟仰高村之
原

晁冲之字用道一字叔用方紹聖之初天下偉異豪爽絕特之
士離讒放逐晁氏羣從多在黨中叔用于是飄然遺形遊而去

之宅幽阜蔭茂林子具茨之下暨朝廷諸公謀欲起之乃復歸
心獨往高揖而不顧至於疾革乃取平生所著書聚而焚之曰
是不足以成吾名生平論著多不傳惟具茨集行於世

王鬱字飛伯大興人儀狀魁竒目光如鶻少居釣臺閉門讀書
不接人事為文法柳宗元詩效李白嘗作王子小傳以自序天

興初汴京被圍上書言事不報後為兵士所忌見殺臨終懷中
出書曰是吾平生著述可傳付中州士大夫曰王鬱死矣時年

三十餘舊志引金史入備遺今改歸高賢

徐中孚其先湖廣邵陽人父明善由儒士宏才博學正統間大
學士楊溥薦知州事居數年民感其澤遂占籍焉耕釣潁褚之

禹州志

卷之二十一

列傳五

三

間生子永七歲稱神童矢口成文未冠發鄉科登進士官至泰
議子孫多醇良郡人推為冠冕

李夢陽字獻吉陝西慶陽人也父流寓大梁母夢日墮懷中寤
而生夢陽故名年十八舉山西鄉試第一明年宏治癸丑舉進

士丁內外艱戊午授戶部主事倡古文辭以變衰陋斷自秦漢
而止六代以下弗論也乙丑進員外郎外戚壽寧侯張氏怙寵

驕縱開張皇店奪民莊田聲焰薰灼莫敢問夢陽上疏論爭張
后怒甚孝廟下夢陽錦衣衛獄孝廟坐文華殿召見大學士劉

健李東陽謝遷問李夢陽宜何如健叩頭對曰夢陽狂直不足
深罪孝廟色變東陽不敢對叩頭而已遷從容對曰夢陽雖狂

然其心無他實欲効忠於陛下孝廟曰謝先生言是有旨夢陽復職一日孝廟獨召見兵部尙書劉大夏謂曰初下夢陽獄中中人皆勸朕杖之其意實欲殺夢陽以快中宮之怒使朕負殺直臣名其不忠如此朕故釋之大夏曰陛下此事卽堯舜之心正德改元丙寅進郎中太監馬永成劉瑾等蠱亂朝政給事中劉蒞陶諧相繼論奏而大臣未有言者戶部尙書韓文曰流涕憂憤夢陽進曰大臣曰國休戚此而不言焉用彼相文慨然曰吾當言言而獲罪報先皇帝於地下耳乃令夢陽草奏上之疏入詔廷議其事而瑾等八人環哭上前乞命事中變瑾遂召入司禮監而中官王岳范榮皆竄死明年丁卯大臣多罷免瑾知禹州志

卷之二十一 列傳五

三

韓䟽出夢陽手蓄憾不已矯旨奪健等四十八人官放歸田榜爲黨人夢陽與焉瑾欲殺夢陽又明年戊辰矯旨羅織成罪械繫逮京師再下錦衣獄夢陽婦弟左國玉間行徒步從上書脩撰康海勉以大義賴力救得免放歸大梁庚午瑾敗辛未起嘉陽江西提學副使振起古學力變宿習褒獎義節訓正禮俗士翕然向風夢陽才高氣不肯同流俗人多忌之御史江某與之有嫌遂相奏許天子命大理卿燕忠體勘下夢陽廣信獄摧苦殊甚不稍爲屈予聞住後大臣暨撫按數論薦不用所著有腔峒集若干卷嘉靖辛卯就醫京口還大梁病卒葬禹州大陽山下安陽崔銑爲墓誌銘吳郡袁袞表其墓空同八世孫卒

政其詩集後謂家緒中 微轉徙朱仙鎮數世單傳先隴在大
山未獲以時祭掃康熙 間州人辰州通判劉湛過襄陽見空同
女孫適孟氏者訪其先 墓湛子玉威又與甥孫孟仲昭同謁舊
阡皆賦詩以記云 舊志本集 參

宋登春新河人能詩文 居陽翟與黨中丞善

張鼎文浙江秀水人善 古文詞避讐亡命黨中丞時為藩伯愛
其文携至禹薦於徽藩 教諸公子魏大司空亦敬禮之四方求
文者益衆會上書大學 士張居正居正奇之禹碑銘撰記多出
其手書效趙子昂體雖 委巷遠村莫不藏其筆跡卒葬城西二
里許著有椒葉生集二 十卷行於世

禹州志

卷之二十一 列傳五

韓鼎業字子新直隸盧 龍人舉明經侍御應庚之孫博學能文
慷慨尚氣節從學夏峰 孫徵君鍾元門與宋琬湯斌諸公游相
友善嘗過大梁倡脩信 陵君祠登大陽山封李崆峒墓因與州
守史口有舊自密來訪 遂家於此所著有友棠樓集年七十餘
卒

鍾國士字爾知懷慶河 內人性狷介端方不逾繩尺少從學夏
峰與耿逸菴太史韓子 新明經為同學益友康熙丁巳講於禹
遂家焉年五十餘偶疾 作詩戒子一夕沐浴畢端然而逝

葉魯白徽州歙縣人年 七十餘携一琴一笛客遊於禹琴得楊
太常遺響妙絕一時酒 酣輒慷慨起舞或賦詩吹笛作梅花弄

自謂於笛能吹七調半他人不知也以疾卒其友韓鼎業葬之
潁水之原焚琴墓下以上俱刪
改舊志

禹州志

卷之二十一 列傳五

三